



Headlines

- प्रधानमंत्री नरेन्द्र मोदी होर कल कटरा-अमृतसर बश्कार “वंदे भारत एक्सप्रेस रेल सेवा” गी वर्चुअल ढंगे कन्नै झंडी दस्सियै रवाना करगंन।
- एयर चीफ मार्शल A.P. सिंह होरें आक्खेया ऐ जे भारत नै आप्रेशन सिंदूर दौरान पाकिस्तान दे 5 लड़ाकू जहाजें गी नष्ट करी दिता ऐ।
- कुलगाम च आतंकवादियें कन्न चला रदे टाकरे दे नौमें रोज 2 जवान शहीद होई गे न।
- सालाना श्री अमरनाथ जी दी यात्रा दा सावन पूर्णिमा दे मौके अज्ज समापन होई गेया ऐ।
- रक्खड़ी दा त्योहार जम्मू च बी बड़े उत्साह कन्नै मनाया गेया। राष्ट्रपति द्रौपदी मुर्मू ते प्रधानमंत्री नरेन्द्र मोदी होरें सब्भनें गी रक्खड़ी दी ममारखां दितियां ते इक जुटता ते महिला अधिकारें पर जोर भरेया।



Katra- Amritsar

प्रधानमंत्री नरेन्द्र मोदी कल 10 अगस्त गी अमृतसर ते श्री माता वैष्णो देवी कटरा बश्कार “वंदे भारत एक्सप्रेस रेल” सेवा गी झंडी दस्सियै रवाना करगंन। जम्मू रेल डिविजन दे इक बड़े अफसर नै दस्सेया ऐ जे इक वंदे भारत ट्रेन माता वैष्णो देवी कटरा थमां अमृतसर तगर चलोग ते इक ट्रेन अमृतसर थमां कटरा तगर चलोग। ए ट्रेनां मंगलवार गी छोड़ियै हफ्ते दे 6 दिन चला करौग। कटरा थमां चलने आहली रेल बडुलै 6.40 पर रवाना होग ते अमृतसर 12.20 पर पुज्जोग। इस रेल दे स्टाप जम्मू-पठानकोट-जलंधर ते वियाग होगंन। अमृतसर थमां चलने आहली रेल उत्थूआं संजा 4 बज्जियै 25 मिनटें पर चल्लोग ते 10 बजे कटरा पुज्जोग। ऊआं उत्तरी रेलवे नै अज्ज कश्मीर घाटी च अनंतनाग रेलवे स्टेशन गी माल दी दुआई आस्तै खोल्ली दिता ऐ। रेलवे नै इक ब्यान च आक्खेया ऐ जे कश्मीर घाटी च आर्थिक गतिविधियें गी बढ़ावा देने दी दिशा च इक बड्डी गें दे तौर पर उत्तर रेलवे नै माल दी दुआई आस्तै अनंतनाग रेलवे स्टेशन गी खोलया ऐ। अनंतनाग स्टेशन हर रोज बडुलै 6 बजे थमां रातीं 10 बजे तगर कम्म करा करोग। एहदे नै बागवानी ते दस्तकारी कन्नै जुड़े दे लोकें गी बजारें तोहड़ी अपने उत्पाद पजाने च मदद मिलोग।



Railway Return Journey

रेलवे नै इक राउंड ट्रिप पैकेज योजना लागू करने दा फैसला लैता ऐ। जेहदे तैहत यात्रियें गी वापसी यात्रा 20 फीसद छूट दिती जाहग। रेल मंत्रालय नै ब्यान च आक्खेया ऐ जे इस योजना दे तैहत एह छूट उसलै लागू होग जिस्सलै इक्के समूह दे यात्री जाने ते वापसी औने दी टिकट बुक करगंन। मंत्रालय नै अगगे इब्बी दस्सेया ऐ जे इस योजना दे तैहत बुक कीती गेदी टिकटें दा कराया वापस नेंई कीता जाहग। इस योजना दे तैहत 13 अक्तूबर थमां अगगें दी टिकटां बुक कराने लेई बुकिंग इस महीने दी 14 तारीख थमां शुरु होग।

<><><><><><>

Chief Air Staff

चीफ ऑफ दा एयर स्टाफ, A.P सिंह होरें आक्खेया ऐ जे भारत नै आप्रेशन सिंदूर दौरान पाकिस्तान दे पंज लड़ाकू जहाजें गी क्षति पजाई ऐ। अज्ज बंगलूरु च 16में एयर चीफ मार्शल L.K. Katre दे व्याख्यान च बोलदे होई एयर स्टाफ चीफ होरें आक्खेया ऐ जे भारत आस्सेया पाकिस्तान दे वायु सेना दे 5 जहाज ते इक एयरबोर्न एयर क्राफ्ट गी नुकसान पजाया ऐ। वीडियो फुटेज कन्नै तफसील च गल्ल करदे होई उनें आक्खेया ऐ जे उंदे कश घट्ट थमां घट्ट 5 लड़ाकू जहाजें ते इक बड्डे एयरक्राफ्ट गी नुकसान पजाने दे सबूत ना। एयर चीफ होरें इब्बी दस्सेया ऐ जे साढ़ी त्रौनें सेनाएं आपसी तालमेल बनाइयै शानदार प्रदर्शन कीता ते S400 प्रणाली इक क्रांतिकारी बदलाव साबत होई ऐ। उनें दस्सेया जे S400 नै पाकिस्तान दे विमाने गी साढे तगर पुज्जन गै नेंई दिता।

<><><><><><>

Kulgam

जम्मू-कश्मीर च कुलगाम जिले दे जंगली इलाके च सुरक्षाबलें ते आतंकियें बश्कार चला रदे टाकरे च गंभीर चाल्ली कन्नै घायल होए दे दंऊ जवान शहीद होई गे ना। कश्मीर घाटी च एह अभियान सब्भनें शा लम्मे चिरे तोड़ी चला रदा अभियान ऐ जेड़ा 9में दिन च दाखल होई गया ऐ। एह टाकरा इस महीने दी पैहली तरीख गी शुरु होआ हा। श्रीनगर दी चिनार कोर दे इक प्रवक्ता नै अपने सोशल मीडिया हैंडल पर शहीद होए दे जवानें दी पंछान लांस नेक प्रितपाल सिंह ते सिपाही हरमिंदर सिंह दे तौरा पर कीती ते शहीदें गी श्रद्धांजलि बी भेंट कीती ते सोगी परोआरें कन्नै हमदर्दी बी जताई अभियान अजें बी जारी ऐ।

<><><><><><>

Kulgam Revised

लैफ्टिनेंट गवर्नर मनोज सिन्हा होरें कुलगाम च आतंकवादियें खलाफ जारी टाकरें च शहीद होने आहले फौज दे जवानें L.N. प्रीतपाल सिंह ते हरमिंदर सिंह गी श्रद्धांजलि भेंट कीती। तोंआई मुख्मंत्री उमर अब्दुल्ला होरें बी इनें वीर जवानें गी फुल्लें दी माला चाढदे होई श्रद्धांजलि भेंट कीती।

<><><><><><>

Guidelines National Awards

प्रशासनिक सुधार ते लोक शिकायत महकमे नै e-governance आस्तै 23 में राष्ट्रीय पुरस्कार-2026 आस्त स्कीम मार्गदर्शन जारी कीता ऐ। कार्मिक-लोक शिकायत ते पैशन मंत्रालय नै इक ब्यान च आक्खेया जे e-governance आस्तै राष्ट्रीय पुरस्कार आस्तै नामांकन वैब पोर्टल <http://www.nceg.gov.in> पर पहली सितम्बर थमां जमा करवाए जाई सकदे न। प्रार्थना-पत्र जमा करवाने दी अखीरी तरीक 15 अगस्त ऐ। ए राष्ट्रीय पुरस्कार हर बरे e-governance दे क्षेत्र च उत्कृष्टता ते बेहतरी आनने दे सम्मान च दिते जंदे न। डिजिटल प्रशासन च पंछानजोग महत्वपूर्ण उपलब्धियां- कारगर तरीके गी सांझा करने च बाद्दा ते नमियें काडे गी अगो लेइयै जाने आले गी ए पुरस्कार दिते जंदे न।

<><><><><><>

Amarnath Yatra

छड़ी मुबारक कन्नै भगवान शिव ते माता पार्वती उन्दी गदा अज्ज बडुलै पवित्र गुफा पुज्जी गई जेदे कन्नै इस साल दी श्री अमरनाथ जी यात्रा सावन पूर्णमाशी दे मौके सम्पन्न होई गई। गुफा च पूरा दिन पूजा-अर्चना साधु महन्ते तरफा पूरे रीति-रिवाज कन्नै चली। भगवान शिव दे गुणगान च वैदिक मंत्रे दे उच्चारण कन्नै पूरी दुनिया आस्तै शांति-खुशहाली दी प्रार्थना कीती गई। अमरनाथ जी दी यात्रा 1 जुलाई गी शुरु होई ही ते रक्खड़ पुनेया दे मौके एदा समापन तय हा। प्रशासन गी जरूरी मुरम्मत ते कम्में लेई यात्रा दी अवधि गी भारी बरखा करी घटाना बी पेया। 30 दिने तोड़ी चली दी यात्रा दे दौरान तकरीबन 4 लक्ख यात्रुएं पवित्र गुफा च हिमलिंग दे दर्शन कीते। गुफा तोड़ी दवै बेस कैम्पे तोड़ी पुलस-CRPF-सुरक्षा एजेंसियें ते मकामी लोकें दे सहयोग कन्नै इस बरे यात्रा पूरी रमानदारी ते शांतिपूर्ण ढंगै कन्नै सम्पन्न होई। पूजा-अर्चना ते सारी रस्मे दे मगरा पवित्र गदा अज्ज शामी श्रीनगर दे दशनामी अखाड़ा आस्तै रवाना होगा।

<><><><><><>

Raksha Bhandan

बैहनें-पराएं दे प्यार दा प्रतीक रक्खड़ी दा त्योहार देश दे दुए हिस्सें आला लेखा जम्मू च बी पूरी धूमधाम कन्नै मनाया गया। इस दिन बैहनां शैल कपड़े पाइयै- सज्जियै-सवरियें अपने पराएं दी बाई पर रक्खड़ी बन्दियां न ते उन्दी लम्बी उम्री दी प्रार्थना करदियां न। भयाई दी बैहनें च इस त्योहार पर अपने प्योके आने दा खास शौक हुंदा ऐ। भ्रा बी इस त्योहार पर बैहनें गी तोहफे दिन्दे न ते उन्दी रक्षा करने दी सौगंध लैन्दे न। जम्मू खिते च इस दिन

पतंगबाजी दी गर्मजोशी बी दिक्खी जंदी ऐ। नौजवान बड़े शौक ते जजबें कन्नै गुड़ियां बदांदे ना। रक्खड़ी दे पावन त्योहार पर राष्ट्रपति द्रोपदी मुरमू होरें ते प्रधानमंत्री नरेन्द्र मोदी होरें देशवासियें गी त्योहार दी शुभकामनां दितियां ना। राष्ट्रपति होरें आक्खेया जे ए त्योहार समाज च भाई-चारे ते एकता दे जजबें गी मजबूत करदा ऐ ते भ्रा-बैहनें बश्कार प्यार ते विश्वास दे रिश्ते गी बी गूढा करदा ऐ। जम्मू-कश्मीर दे उपराज्यपाल मनोज सिन्हा होरें बी सारें गी रक्खड़ी दी मुबारकवाद दिती ऐ।

<><><><><><>

Girls Rakhi Jawans

अज्ज रक्खी दे मौके पर पूरे जम्मू खिते च कुड़ियें ते महिलायें दे मते सारे समूहें, फौज, अर्ध-सेना बलें ते पुलस दी इकाइयें च जाइयै राष्ट्र दी राक्खी करने आहले कन्नै रक्खड़ी दा त्योहार मनाया, जेहड़ा अपने परोआरें शा दूर न ते म्हेशा अपनी ड्यूटी करदे होई, इस चाल्ली दे त्योहार मनांदे ना। इक विद्यार्थी आकृति शर्मा नै आक्खेया ऐ जे एह जवान अपने घरें थमां मीलें दूर न ते बन्नै पर राष्ट्र दी सेवा ते रक्षा करदे न, साढा एह फर्ज बनदा ऐ जे अस उंदे कोल आइयै उनेंगी रक्खड़ी बन्नियै उन्दे कन्नै एह त्योहार मनाचै। तोंआई राजौरी दी इक कुड़ी मिनाक्षी नै बी आक्खेया ऐ जे इनें कर्मियें गी रक्खड़ी बनने दा मकसद इयै ऐ जे इनेंगी एह नेंई लगै जे उन्दी बैहनां उन्दे कश नेंई हैन, कीजे एह बन्नै पर तैनात रेइयै साढी सुरक्षा गी यकीनी बनांदे ना।

<><><><><><>

Raksha Bhandhan Kishtwar

किश्तवाड़ जिले च बी रक्खड़ी दा त्योहार बड़े उत्साह कन्नै मनाया गंया। इस शुभ मौके पर पस्सरकूट च प्राचीन नैडगाम शिव गुफा यात्रा दा आयोजन कीता गया, जेड़ी पिच्छले केंई दहाकें थमां हर बरे चलदी ऐ। एह यात्रा पस्सरकूट दे कालका मंदर थमां शुरु होई ते शिवगुफा नैडगाम च जाइयै सम्पन्न होई। इस गुफा च ज्हारां शिवलिंग न ते कुदरती पानी आहली एह गुफा भक्तें आस्तै इक पवित्रा थाहर ऐ। इस यात्रा च ज्हारां लोक शामिल होए। एहदा संचालन बड़े उत्साह ते श्रद्धा कन्नै कीता गया, जेहड़ा समाज ते उंदी आस्था दे बश्कार मजबूत बंधन गी दर्शादा ऐ।

<><><><><><>

Tomato Prices

सरकारै आक्खेया ऐ देश भरै च टमाटर दी कीमतें च तेजी कुसै बी बुनियादी मंग-आपतिं जां उत्पादन च कमी दे बजाय अस्थाई मकामी कारकें दे कारण आई ऐ। उपभोक्ता मामलें, खाद्य ते लोक वितरण मंत्रालय नै दस्सेया ऐ जे जुलाई दे खीरी हफ्तें थमां दिल्ली ते मुल्ख दे उतरी ते उत्तर-पश्चिम इलाकें च मती बरखें कारण टमाटर दी कीमत 73 रपे फी किलो होई गेई ऐ। मंत्रालय नै दस्सेया ऐ जे मौसम खराब रौहने करी गै टमाटरें दी कीमत 85 रपे फी किलो पुज्जी गेई ऐ ते पिच्छले इक हफ्ते च आजादपुर मंडी च रोजाना औने करी टमाटरें दी कीमतें च गिरावट आई ऐ।

<><><><><><>